

Qaratsap aanaartoorneratigut timip ilaanik nukillaartoornermik nappaatillit siunnerfilimik aaqqissuussaalluartunik aammalu ataqatigiissarneqartunik sungiusaanissanik ingerlatsinissani iliuusissatut pilersaaruteqarnissat pillugit Naalakkersuisut kingusinnerpaamik UPA 2016-imi Inatsisartunut aalajangiiffigisassatut siunnersuusioqquneqarnissaannik siunnersuut.
(Inatsisartunut ilaasortaq Agathe Fontain, Inuit Ataqtigiit)

Akissuteqaat

(Peqqissutsimut Naalakkersuisoq Doris Jakobsen)

Aappassaaneerpeqarnera

Naalakkersuisut Inatsisartunut ilaasortap siunnersuutaanut, Ilaqutariinnermut Peqqissutsimullu ataatsimiititaliullu peqqissaartumik isumaliutissiissutaannut qujanaq.

Piginnaangorsaqqinneq sorpassuupput assigiinngitsorpassuarnillu imaqarluni. Ulluinnarni utoqqarnik piginnaangorsaqqinneq sanngiillinnginnissaanik imminut ikiorluarnerulernissaanut ikiuinermik qulakkeerinninnermiit innuttaasunik inuunermik ulorianartorsiorititsisumik nappaatilinnut timikkut tarnikkullu. Naak piginnaangorsaqqinnerit ataasiakkaat killeqaraluartut ataatsimik arlalinnilluunniit ataasiakkaanik angusaqarnissamik siunertaraluartut, taava innuttaasut amerlasuut piffissap ingerlanerani arlalinnik pisariaqartitaqassapput nutaanik pisariaqartitanik pilersoarneragut taamaasillunilu anguniagassanik nutaanik peqalerneragut.

Taamaasilluni piginnaangorsaqqinneq iliuusissanik taamak assigiinngitsunik iliuuseqartarneq imaqarmat pisariaqartarpoq peqqinnissaqarfup akulerunnissaa unitsinneqarnermi soorluttaaq innuttaasup angerlarsimaffimmilit ulluinnaq nakorsiarerneragut ilaatinneqartarnissaa. Minnerunngitsumik utoqqaat eqqarsaatigalugit, piartortilluni sullinneqarnermi kiisalu aanaartooreernerup kingorna piginnaangorsaqqinnerup sunniutai pitsaasut pigiinnarnissai pisarmata innuttaasup angerlarsimaffiani taakkulu kommunip inunnik isumaginninneranut paarsineranullu atassuteqartarmata.

Tamannalu isumaqarpoq Piginnaangorsaqqinnermi akisussaaneq tigummissarmassuk soorlu Peqqissutsimut Naalakkersuisoqarfik, Isumaginninnermut Naalakkersuisoqarfik minnerusutigullu Inuussutissarsiornermut Naalakkersuisoqarfik kiisalu kommunit. Pingaaruteqarpoq taakkua assigiinngitsut akisussaaffitsik ilisimanissaat innuttaasut ataasiakkaat pisariaqartitaasa kivinnissaanni. Tamanna malittarisassanik ersarissunik pisariaqartitsinermik imaqarpoq. Nuannaarutigaa Ilaqutariinnermut Peqqissutsimullu ataatsimiititaliap tikkuarsimammagu piginnaangorsaqqinnermi neqeroorut qulaatigut aaqqissuussinermi pisariaqartitsisunut tamanut atuunnissaa aammalu piginnaangorsaqqinnermut aaqqiissutitut takoqqullugu.

Ilaqutariinnermut Peqqissutsimullu ataatsimiititaliap isumaqatigiillutik allannguutitassatut siunnersuutigisimavaa ataani allaqqasoq:

Sungiusaqqinnissamik tassungalu ilanngullugu sungiusarnissamik pisariaqartitsisunut tamanut siunnerfilimmik, aaqqissuulluakkamik ataqatigiissumillu ingerlatsinissamut peqataaqataasinnaasunik suliniutissanut periusissiassamik kingusinnerpaamik UPA 2016-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Naalakkersuisut innersuutigaa allannguutissatut siunnersuut akuereqqullugu.